

04 MAR 2001

Presiden-Felda

PRESIDEN COLOMBIA LAWAT FELDA SEMENCHU DI KOTA TINGGI

KOTA TINGGI, 4 Mac (Bernama) -- Presiden Colombia, Andres Pastrana Arango dan isteri Nohra Puyana hari ini melawat ke Tanah Rancangan Felda Semenchu yang terletak kira-kira 40km dari sini untuk melihat dengan lebih dekat pelaksanaan program penanaman kelapa sawit di negara ini.

Lawatan beliau ke tanah rancangan Felda itu adalah atas perlawanan Perdana Menteri Datuk Seri Dr Mahathir Mohamad setelah Colombia menunjukkan minat yang mendalam untuk mempelajari program pembangunan rancangan tanah seperti Felda untuk dilaksanakan di negara itu.

Turut mengiringi Presiden ialah Menteri Luar Colombia, Guillermo Fernandez de Soto, Menteri Sains Teknologi dan Alam Sekitar Datuk Law Hieng Ding, sementara Menteri Luar Datuk Seri Syed Hamid Albar dan isteri, Datin Seri Sharifah Aziah Syed Zainal Abidin menyambut ketibaan rombongan Presiden itu.

Presiden Colombia itu tiba pukul 10.05 pagi tadi di padang berhampiran Dewan Jawatankuasa Kemajuan dan Keselamatan Kampung (JKKK), Felda dengan menaiki helikopter "Black Hawk" Tentera Udara Diraja Malaysia dari Senai, Johor Baharu.

Sebaik tiba, rombongan Presiden itu disambut dengan paluang kompang, persembahan pencak silat dan tarian kuda kepang oleh penduduk dan pelajar sekolah di tanah rancangan itu.

Pastrana, kemudian diberikan taklimat selama 30 minit mengenai latar belakang Felda Semenchu seluas 2,500 hektar dan perkembangannya sebagai antara tanah rancangan Felda yang berjaya dengan jumlah penduduk kini seramai 5,500.

Rombongan Presiden kemudia dibawa melawat ke sebuah rumah contoh milik seorang peneroka, Zakaria Mohd Yassin dan isterinya, Norsiah Mohd Shah di Lot 174 Jalan Bunga Mawar, Felda Semenchu.

Pastrana dan isteri turut mengadakan lawatan ke kilang sawit Felda Semenchu untuk melihat secara dekat bagaimana buah kelapa sawit diproses dan produk yang dapat dihasilkan daripada komoditi itu.

Syed Hamid ketika ditemui diakhir lawatan itu berkata Presiden Colombia itu melahirkan rasa gembiranya mengenai sambutan yang diberikan oleh penduduk di tanah rancangan itu serta amat mengemari makanan tempatan yang dihidangkan termasuk lemang dan rendang ayam.

Tanah Rancangan Felda Semenchu yang dibuka sejak tahun 1977 kini mempunyai seramai 628 buah keluarga dengan setiap peneroka telahpun dikurniakan geran tanah masing-masing penghujung tahun lepas.

Felda Semencu juga dikatakan berjaya mengatasi purata pengeluaran bulanan tanah rancangan di seluruh negara iaitu sebanyak 26 tan metrik berbanding antara 17 dan 18 tan metrik di peringkat nasional.

-- BERNAMA

RAM FAZ